

БЛАГОВѢСТИК

ДУХОВНА ГАЗЕТА ДЛЯ ПОДКАРПАТСКИХ РУСИНОВ

Выходить двараз в мѣсяць
каждого 1-го и 15-го.

А Д Р Е С:
редакціи и експедиції:
REDAKCIJA „BLAHOVISTNIK“
Užhorod, Kapitulska, 3.

ПРЕДПЛАТА:
на рок 12.— К
одно число — 60 К
За границу 20 — К
До Америки..... 1 Д.

ОБЯВЛЕНИЯ
принимаются по цѣнѣ
за 1 сторону .. 100 К
за 1/2 сторону .. 50 К
за 1/4 стороны .. 25 К

О христіянской пресѣ.

У едной франузской газетѣ, заступающей интересы жидов, един вождь жидов помѣстив воззваніе, в которомкаже, что жиды повинны ко себѣ притягнути золото свѣта, т. е. банки, торговлѣ, маєтки и потом пресу, т.е. новинки и книжки, и так же — станеме панами людскоть опиніи (думаня) и здобудеме власть над масами.“

Из сих слов жидовского проводира ясно, як велику важность має газета и книга на чоловѣка. Яку новинку читаеме, такого духа и набираємсѧ. Постепенно перемѣнить она наше думаня, закраде у сердце наше свои почуваня, учинить нас рабами своих идей.

Позерайме лиш на нашу бѣдну Подк. Русь. Прочто идо так тяжко оборона наших духовных интересов? Прочто миє так много шкодников наше народное воскресеніе?

Прото, ибо наш народ мало читає, а кто читає, тому попаде до рук скорше така газета, котру даром засылаютъ, ик своя, за котру платити треба.

Но тата чужа газета разносить яд, отрову душевну. Агитаций Р. Землѣ и подобных писанин раздули в нашем народѣ ненависть против своеї Церкви, своеї вѣры и своего духовника.

А тата часть нашої интеллигенціи, котра и днесь нехристіянскѣ газеты читає, из сих набралася такого поганого духа, что лютый ворог не має таکої ненависти против шишек швирь, против наших народных интересов, як „наши“ пополкъ интелигенты.

Накинулися на нашу вѣру кацапы-шизматики-большевики и безсовѣстнѣ жидовскѣ револвер-журналисты на нашу вѣрооборонну, апостольску працю с порожними накидами украинизма, клерикализма и поообными и подѣлили народ на противнѣ ворожѣ таборы, так что брат против брата выступає вмѣсто хосенноѣ, спольноѣ працѣ.

У нас до сих пор мало думали людє на новинку и книжку. Не радо жертвовали, но читали то, что в руки попало, неуважаючи на то, ци доброе то, або злое.

Забывают наши людє, что без газеты не возможно запановати над умами и сердцями.

Забывают, что в свѣтѣ ведеся завзята борьба, межи двома свѣтоглядами, т. е. христіянским и атеистичным т. е. безбожным.

Забывают, что не лиш тот е па сторонѣ безбожных, который вже явно голосить свою безбожность, но и тот дух тмы розширає, кто постепенно вырыває чувство побожности из сердець. Кто хоть одну правду вѣры откине, тот уже не е на сторонѣ христіянскої побожности. Так и у нас, всѣ директнѣ, або индиректнѣ высловы и писаня против единства Церкви, против управы и видимої головы Церкви, и духовенства всѣ-всѣ служать тому злому духови, который, е головною причиною нынѣшної свѣтової катастроfy.

А в той свѣтовой борьбѣ головным оружiem є новинка и книжка.

Печатаное слово доходить дальше, як живое, оно не спознає границь, оно не лиш раз вражает на нас, но и больше раз, ибо печатаное слово можеме повторяти, и так оно глубше дѣлає на нас, як говоренное слово.

Не раз вже добра книжка отвернула человѣка от злого живота. В доброй новинцѣ и книжцѣ видить розумный христіянин своего доброго друга, утѣшителя и учителя.

Если хотеме, чтобы Христовий мир пановав во душах наших, то не доста, чтобы мы лиш в метрицѣ были записанѣ христіянами, но чтобы сме дѣйстно знали Христа и ним одушевлялися, чтобы сме Христову програму переводили в житя.

Сторонники безбожности дуже много жертвуютъ на прессу, вороги христіянства таким тайным способом пишуть

Рок 1923.

„БЛАГОВІСТНИК“

Сторона 183.

в своих газетах, что християнин и не утамить, коли погубить свою орієнтацію.

Велика, несвідома масса християнства приймає чотириенно отрову злоби прессы. И у нас колько християнских родин читає всякого рода жидовских и карапаских писанин!

Вон з такими новинками из християнскої хаты!

Бл. памяти папа Пій X. сказав: „Не доста будовати церкви, закладати школы, устроювати міссії, всѣ наши усилия задаремнѣ, если ровночасно не будеме мати одповѣдної, прессы, як оружія до обороны и до наступу.“

Вся наша духовна жизнь, вся народна праця о много успѣшнѣйше буде розвиватися, если не будеме читати противных нашему релігійному и народному духови газет, и если будеме мати своеї, чисто своеї християнско-католическої и русько-народної прессы!

В.



Бог не дасть ругатися над собою.

Недавно номер др. Фабас, славний лѣкарь французскій, который оповѣдає слѣдуючу подъю из своеї практики.

Мое отечество Франція. Я живъ под Пиренеями. (Горы, котрѣ дѣлять Францію од Іспаніи). Едного дня прійшов до мене молодый чоловѣк з раною на нозѣ над колѣном. Рана была вже стара и незвичайна: всегда было в ней живых черваков. Я пробовав всѣ можливѣ мединаменты, чтобы повыганятии черви, але мой труд быв даремный. Едного дня перегварив до мене мой пацієнт слѣдуючѣ слова:

„Пане лѣкаре! Не пробуйте дальше жадного лѣка. Я з такою ногою мушу положити ся до гробу.“

Справдѣ, отвѣтив я єму, та рана е для мене щось не

звычайного. Я много раздумую о ней. Як лѣкарь мав емъ всѣлякѣ вже слuchaѣ, але такоѣ раны я еще не видѣвъ. Гдѣ сте достали сюю рану?

В Испаніи — отвѣтив хворый. — Теперь я Вам кажу, длячого и вы як и всѣ другіѣ лѣкарѣ не годай вылѣчити тоѣ раны. Мав емъ 20 лѣт, як я 1793. року зостав воякомъ, и быв емъ посланный до Испаніи. З моего села ишли со мною ще мои товариши Тома и Франциско. Безвѣріе того часа наповнило было и наши душы, а мы то хотѣли и дѣломъ посвѣдчили. Едного дня пошли мы троме до ближнього села. Перед селомъ видѣли мы образъ Матери Божої ПренепорочноНої, котрый пѣлое село даже почитало. Еден из моих товаришовъ зачав смѣяти ся з образа Матери Божої и говоривъ, якій то еще шаленый народъ, котрый такъ рѣчи вѣрить. Мы носили з собою пушки. Тома намъ совѣтовавъ, чтобысме стрѣляли до образа Матери Божої и такъ показали свое безвѣріе, як и то что ничего не боимся. Франциско з великою радостю на то пристав. Я не мав досить смѣлости оперти ся той постановѣ. Коли мои товариши зачали смѣяти ся з мене, же я боягузъ, то и я пристав на то. Тома першій выстрѣливъ и потрафивъ посеред чола, Франциско потрафивъ посеред грудей, а я з страху запер очи и выстрѣливъ емъ и потрафивъ . . . „Над колѣномъ?“, запитав лѣкарь. Такъ! „О теперъ я розумѣю ту дивну рану“, сказав лѣкарь. Як мы той злочин окончили, пошли 'съме дальше смѣючися з шаленства простого народа. Коли люде побачили, что мы наробыли, даже гнѣвали на насъ, але разомъ бояли ся сказать намъ то, побачили, что мы дикѣ люде. Лишень одна старушка скричала за нами: Вы нас скоро пойдете до войны. Что сте зробили, то вамъ не принесе счаствя.

Тома обернувъ ся до старушки и хотѣвъ и на ю стрѣляти. Старушка острим окомъ на него дивила ся и не сказала больше ничего. Я быв даже потрясенный до того. Такъ само и Франциску не мило было при сердѣ. Але мы передъ людьми не хотѣли того показовати. — За пару днівъ ишли мы до огня.

Мушу признати ся, же емъ з великимъ страхомъ ишовъ до войны. Гадка на образъ Матери Божої не выходила з моей думы. Але насъ всѣхъ трохъ щасливо повернуло з того огню.

Тома ще достав и колайну. Непріятель мусѣв втѣкати перед нами. Ми вже тѣшилися побѣдою, але на раз пукне пушка и потрафила Тому серед чола. Он закрутив ся и впав мертвый. Даремна була наша цомоч. Франциско оглянув ся на мене, а я на него, и мы вже знали, что і з нами буде, хотій анѣ оден не сказав жадного слова.

Другого дня наш непріятель позберав свои сили и вдарив на нас. Мой товариш стиснув горячо мою руку и проговорив до мене: Днесь на мене ряд: Ты счастливый, же ты слабо трахив. Бѣдный сказав правду. Непріятель быв сильнійшій од нас и мы мусѣли втѣкати. Але мы еще не були раненѣ. Недалеко од нас в ярку лежав еден ранений шпаньол тримаючи пушку в руцѣ. Пушка пукла и зтрафила моего товариша посеред грудей. Ах, пане лѣкаре, яка то страшна була смерть! Он не помер зараз, валяв ся по землї, просив о священника. Але того не достав. Помер и там на дорозѣ мусѣли мы его лишити, бо треба було втѣкати перед непріятелем.

Од того часу быв и я певний, что и мене чекає. Я твердо постановив собѣ, же як лем найскорше высповѣдаю свой тяжкій грѣх. Але не знайшов ем скоро священника. А понеже через довшій час я не достав нѣякої раны, при забыв я на свою постанову. Коли я по войнѣ вже вергав до Франції, я больше вже ничего не боявся и майже на всео и забыв. Едного дня повертуючи до дому прійшли мы до села, гдѣ мы зробили то страшное bogumerзкое дѣло и на том самом мѣстѣ майому одному товарищowi, коли оглядав свою пушку, пукла пушка, и мене кулька потрафила до ноги, ту гдѣ теперь бачите сю рану.

Так выповнило ся, что нам старушка сказала. Моя рана на першій погляд выглядала дуже легонька. Военный лѣкарь сказав, же то выгоить ся за пару днів. И я так раховав. Але як он задивив ся, а я настрашив ем ся, коли мы побачили, же в ранѣ стали розмножоватися черваки, которых лѣкарь не мог на жаден способ выгнати! Вже 20 лѣт ношу сю рану и пробовав ем вже всѣ можливѣ медикаменты, але на дармо. Я о одно лишењь прошу теперь Бога, чтобы выслушав молитву мою и одпустив ми мой страшный грѣх. Не жалуюся нѣколи на Бога, бо я знаю, же я страшный грѣх

поповнив. Ще больше мушу сказать; я тѣшуся з тою раною, бо через ню вже многѣ души вылѣчилися, а особливо моя душа. Если я помру як правый христіянин католик, то я буду мусѣв дяковати той ранѣ. Тогда аж побачу, якое щастя принесла менѣ сія рана. Всю мою надїю я днесъ покладаю на Пренепорочну, котру я так страшно образив, и так думаю, же ми Она выпросить одищеніе моих грѣхов и же я помру як правый христіянин.



Батюшка Малинич на берегасском учительском конгресѣ сказав одному церк. учителю между прочими: *дурнѣ церк. учителѣ! Прийди до мене за дяка, я ти буду платити.* Дуже красно! Нам на сіи слова два дѣла приходить на розум: Якій священник е о. Малинич, если он дурными почитає в церковных школах дѣйствующих людей? Ци он не має церквов хотя и шизматицьку? Як може он сяк говорити, коли и он быв сяким „дурным“ гр. кат. пъвдоучителем, тогда и он хотѣв платню, но он залишив из безсеріозної причини вѣру свою, стався „священником“ и работаете против церкви Христової и уничтожає истину вѣру в сердцах добрых и честных русинов.

А як вам на велико! Вы ворог и никогда не почитаючій священников истинных, яким великим паномъ есте, что вашего коллегу кличете за „вашого“ дяка и хотите ему платити. Из чого? Так добрѣ заробляете грошей в той церкви, где „по думцѣ Іисуса Христа задарь работаютъ священники“?

Так скоро наповнилисте карман?

Не чудуемся на сем, ви часто не тверезый, и може и се не тверезъсте сказали.

Ай отче мой милостивый! Скажъть леш м'вів одно коли совсъм тверезъ есте: На котрой богословской школѣ або на котром богословском факултетѣ якогось университета кончили вы богословскыя науки, что Вы есте такій гордый священник, что любили бысте интеллигентного дяка и не доставам поколоченою простого человѣка из истинной вѣры изведеного честного русина.

Кажъть отче, ци не почорвенъе ваше лице, коли приступите ко престолу Бога вышняго, и возьмете чашу в руки, и служите „службу вашу“? Кажъть лем пане отче, ци спокойно словъдаете и выдѣлюете тайны Христовы, коли вы ни чули никогда пастырское богословіе и науку нравственности?

Кажъть лем отче, чом вам было недоста стана учительского и сталисьтеся „священником“? Ци так се большое панство и доношу с доходку на только, что Вы и сами можете платити одного дяка.

Но еще одно! Ци тямите вы на конгрес учительскій, коли видѣлисьме Вас в Береговѣ, як истиного и совѣтоватися пришедшого педагога и гордого „священника“ на корѣдорѣ гимназіи в три боки ходити.

Я так думаю, что и вашъ вѣрники не гордяться своим „Отцом“ и Вы не маєте причину гордым быти, ибо и Вы в священническом станѣ так выпозириуете, як рыба на березѣ, яка рожденна не для супи, так приготовленъ и Вы на священническій стан. Вы мѣсто усмѣваня церк. учителей журѣтесь тым, обысте не оскверняли идеалный стан священническій, ибо не кождый знае что Вы шизматик.

А по сemu будьте такъ ласкавѣ, отишъть нам отвѣт Отче превелебный, где Вы получили абсолюторю богословских наук и выхованя для священства? И если докажете, тогды будьте священником и можете кликати за дяка вашего коллегу. А до тых пор размышляте в том, что Вы были, есте и будете.

Я и зато остаюся с любовю Ваш брат.

Оден церковный учитель.

Отдавайте словам их **оригіальне значеніе** казав оден из найбóльших римских отцов: XIII. Лев. И у нас довго злеуживали шизматики им ніяк не належачу назву; право-

славный; с сим они не только наших вѣрников баламутили, но удалися им и уряды привести до того, что почали уже и офиціально православными называть шизматиков. Благовѣстник уже завчасу напоминав читателей своих, „чтобы не украшали вѣроломников красною назвою — „православный“; здається, что остереги нашей газеты не были безуспѣши. Епархіальна конзисторія на одном из послѣдних засѣданій обернулася до Школьного Отдѣла, чтобы офиціально заборонив злеуживаня слова „православный“ из стороны шизматиков. Школьный Отдѣл вдячно удовлетворив желанію конзисторіи и с подписом п. вице-губернатора, П. Еренфельда и мин. совѣтника Іос. Пешека выдав розпорядженіе до всѣх дотычных урядов, что урядовъ назвы христіянских церквей по законам слѣдують:

- a) Гр. католическа.
- б) Гр. восточна (а не православна).
- в) Римо-католицка.
- г) Евангелицка и т. д.

Возываеме также всѣх наших вѣрников, чтобы николи не называли отступников православными и требуйме и от урядов, чтобы не смѣли их сею назвою называть и если чтось такого утямиме, зараз заявѣм редакціям Благовѣстника, або Свободы. Час уже порядок завести и в сем дѣлѣ, чтобы шизматики не баламутили дальше людей. Число розпорядженія: 9183/23.

Кто предплатив на „Благовѣстник“ най читає — а кто хоче читати, най предплатить!

Листы до тебе,

любезный мой брате в Христѣ!

Написав: о. АНТОНІЙ МИГАЛОВИЧ.

III.

Слава Іисусу Христу! Брате мой любезный!

Охотно съв я ко столу, написати тобѣ, што я пообѣцяв, же як ся справовати истиннemu христіяну, гр. каєоликови в таком селѣ, де totы „записы православнѣ“ уже готовѣ суть, як напр. у нас.

Першій раз маю подчєркнути, же таке село, в котром увсюды по хыжах ходила уже тата „православна книжка“ и тоты друксорты, до которых записовали людей, — подобное есть полю по лѣтной бурѣ.

Подивимся на такое поле! Едни рослины на земли будуть лежати оторвано от корѣня, други склоненї будуть аж до земли, а трети еще май свѣжко, май красно зелено будуть стояти и сонечными лучами бавитися. Само так розваляє и буря роздора, вѣтер діяволскій село. Найдутся такѣ, котрѣ уже в своем сердцѣ зовсѣм оторвалися от корѣня — от каѳ. церкви, хотя доста чули правду проповѣдати. На против сих уже паша человѣческа сила нич не поможе... только молитва, и Божа ласка, всемогуща сила.

За сяких брате помолитися треба, яко и молится наша Церков увсе...

Но суть такѣ, котрѣ хотї „записалися“ до шизмы, но лиш зато, бо они сами не знали добре, же они тогда якое не добroe дѣло учинили, бо знаеш брате мой, казати так ги е, же перемогли их кум, брат, сусѣда и т. д., легкомыслено повѣровали брехнї, клеветам, поддалися терору и проч.

Сих еще можно подняти, сесь еще годи краснѣ плоды принести. лиш треба руки, котрѣ подоймут и сонца теплого которое оживляє их.

Сонце — то есть Божа благодать — свое буде кончити, лиш ты брате мой с добрыми словами, дѣлами и напоминами будь сяким все на помочи, бо аж ты других приведеш на добру дорогу, а може с тым не единому и спасеніе вѣчное навертаеш, тогда солодкій мой, Бог то не допустить, обы то ты сам утратив...

Диви! Луна от сонця берє свѣтlosti и як то добре в ночи путешествуючому, так и другѣ най от тебе беруть смѣlosti и доброѣ учености и то много поможе в сяком роздорѣ живучому христіяну!

А так нигда обысь не думав, же: что ми до другого... Най ся про мене и вѣшти, або ци я пои? Бо тогда ты несправедливый христіян! Нѣт брате! Ты ъм кажи, же проч с вшиткими иными дѣлами аж за душу е слово, бо — кажи ъм — же и св. Григорій Богослов неповинновався своему отцу тогда, коли он став аріяном быти, но доти толковав му справедливу каєт. Христову вѣру, доки лиш отец не навернувся назад до лона каѳ. церкви.

Кажи ъм, чтобы Христа розорвати не пробовали, бо то невозможno, бо Христос еден лиш и на небѣ и на землѣ, на востоцѣ и на западѣ.

Кажи ъм, обы на церков каолическу не кривдовали, бо ажбы и огня на ю сыпали та и так не переможут еъ, бо Христос казав же Дух Святый в ней буде на вѣки и сами чекелнѣ силы не одолѣют еъ.

Кажи ъм, же доки они Церков Христову кає.-у роздѣловати хоѓять, доти ученѣйшъ сыны Христовъ на цѣлом свѣтѣ соединеніе, унію будують, а цѣла Россія уже близко стоить ид соединенію.

Кажи ъм, же се доки они калу-жабу мечуть на римскаго отда, доти он до Россіѣ міліоны засилае голодающему бѣдному рускому народу, та сякого доброго отда лиш любити можно.

Кажи ъм, же се вынѣшна шизма нич инше, як дуже грѣшна дорога, та сбы вернулися, бо та до вѣчнога пекла веде.

Кажи ъм, обы свое имя не лишили на том нѣцасном папери, бо наше имя не сміє быти в рядѣ періятелей Христової кає Церкви. Зато маєся каждый потрудити в нем, обы його водти вытерли.

Кажи ъм, обы для большої силы соединилися в имени Христа бо: „Идѣже бѣ еста два или три собрани в имѧ мое, тамо есмъ посредъ ихъ“. (Маѳ. 18,20) Каже сам Ісус Христос.

А на дальше брате мой ци они будуть тебе слухати, ци нѣт, с тым ты уже не много творися, ты лиш одну христянску повинность исполняй и то: другого на доброе напоминати и от грѣха задержати.

А коли ты других так красно научовати будеш, тогда ты будь увсе межи тими увсе свѣжо, сильно стоящими рослинами, котрѣ по бурѣ еще май красно бавляться з сонечными лучами, — будь у все межи тими силными дубами, которых вѣтер вырвати не годен, — будь увсе межи героями Христового войска, истинного каоличества. Най будут тобѣ увсе найпершъ дѣла: Бог, душа, вѣра и Церков кає. а лиш потому други за рядом Отец, брат, кум, сусѣда, гроши и т. д....

Повѣм ти навперед, же аж ты межи сими истинными вѣрниками будеш, та тобѣ много треба буде терпѣти... Бо на тебе будут сердити ся шизматики..., сатаном тя будут называть, выгнati, выбiti, умовчati тя будуть хотѣти и тобѣ и минутку не свободно колыбатися, або настрашитися. Бо знаеш, так має с тобою быти дѣло, як в святом Письмѣ есть писано у Мѳ. 7,25: „и снide дождь, и прїдоша рѣки, и возвѣяша вѣтры и нападоша на граминуту, и не па-

Рок 1923.

„БЛАГОВѢСТИК“

Сторона 191.

деся: основана бо бѣ на камени.“ Та сяка має быти твоя кає. вѣра тверда... як камѣнь... против сто и сто других, против хоть якого роздора, против хоть якої брехни и пекельної сили...

И чудесное, то дѣло! сяку вѣру з книжки ся научити, або розумом вынайти, або собѣ заробляти не можно, бо сяку вѣру сам Бог дарує тому, кто собѣ ю просить... Вѣра дар Божій... А опят чудесное и то, же сяку вѣру от другого ни крадцѣ, ни явно, ни гладко ни насилиу увзяти невозможно, хиба ю сам стратить.

Нѣт брате, не стратити, но просити треба от Бога таку крѣпку вѣру, бо на сяку вѣру стоить то в святом письмѣ же „вѣра твоя спасет тя!“

И на основѣ сякої камено-крѣпкої вѣры будь все вѣрним сыном нашої св. гр. кає. Церкви, а силним вѣрником и прихильником соединенія, унії. Чим болше на ню нападают, ты ю тим сильнѣйше полюби. — Най ти буде все перед очами тота красна Божа воля и тота чудесно сильна христіянска идея, што яко сонде лиш едно на пѣлом свѣтѣ, и оно грѣє так на востоцѣ и западѣ ги на югу и сѣверѣ, свое свѣтло лучѣ мече на всѣ 5 частины сего свѣта, так и Христос лиш еден на небѣ и Христова Церков справедлива лиш една може быти на сем широком свѣтѣ. А се Церков е наша прав. каѳолическа, котра всѣ народы соединити хоче в вѣрѣ и котру Церков на Божом основаніи Христовѣ намѣстники, римскѣ отцы управляють.

Научися то, же яко человѣка по лицю познавати, так и справедливу Церков Христову по управляющей головѣ познати, бо котра Церков Петровѣ наслѣдники римскѣ отцы за видиму голову Церкви Христової признае, тота Церков най ся молить хоть на яком языцѣ або обрядѣ тота есть справедлива Церков Христова, а котра то признати не хоче, тота може класти и стораменії кресты, або по 1000 раз на день може ся православным называть, та она увсе лиш у блудѣ буде... Сякъ Церкви соединеніе не люблять, сякъ кажуть же есть руска, французка мадьярска, японска и т. д. вѣра, но по правдѣ дѣло так стоить, же Христос лиш едну Церков основав и то прав. каѳолическу и тоту для всѣх народов и для каждого человѣка. Зато св. апостол Павел красно пише в своем письмѣ: (кор. I. 1, 10.) „Возвѣстися бо ми о Васъ братіє мои, яко рвенія въ васъ суть. Глаголю же сіе, яко коиждо васъ глаголеть. Азъ убо есмъ Павловъ, азъ же Апостоловъ, азъ же Києнъ, азъ же Христов, егда раздѣлися Христосъ?... Нѣт! Христос не раздѣлився и раздѣлити и не можно, бо не можеме так казати, жебы голова Христова была руска, сердце французкое, руки мадярски а ноги япон-

ски и т. д.... бо тот еден и цѣлый Христос має быти Спасителем и вѣчным Богом и саму и томом народу або чоловѣку... То есть мы христіяне з цѣлого свѣта маєме быти в одной фамилії, в одной каѳ. Церкви.

Небо видѣло, же як тепер межи нами ходять діяволы, съют роздор межи христіянами и зато чудесно свѣдчило для нас в селѣ Колчово-Довгое. Може и читав ти уже за то брате мой любезный? Я не видѣв, же што там е и як то было, но коли другъ наочнѣ свѣдки так красно свѣдчать о том, тогда я то крѣпко вѣрю... Видиш, то чудо было в такой хижѣ, котровъ газда гр. каѳ. быв, а газдыня то есть Шафа Анна рим. каѳ. Треба нам лѣпшое свѣдчиня на то, же сѣ два обряды суть сестры собѣ и вѣра их справедлива Христова, истина православна...?

Нѣт брате! Против сякого научованіе св. письма и свѣдѣння самого неба не хоч дальше и слухати тѣ непріятельскѣ шизматицѣ бесѣды, котрѣ против самоѣ Божоѣ волѣ, против наймильшоѣ нашої христіянскої идеї воюють т. е. против Унії. Проч з ними хоть с ким и обстань ся на всегда в лояѣ каѳ. Церкви, бо там ти сердце найде, што туй на земли желае, а душа то, што по смерти жадае.... Та ци так брате мой любезный же обстанеш вѣрным и крѣпким гр. каѳоликом?! На ти Бож поможе! Бывайте здоровъ, кто буде читати и котрѣ будуть слухати; Другій раз ти напишу, же як бы totu душевну хвороту шизму лѣчити.

Интересантнѣ пророчества.

Общеизвѣстное е пророчество св. Малахія, епископа Армалского (умер в р. 1148.) о рядѣ Римских Отцов, которое пророчество первый раз Арнольд Віон в. р. 1595. выдав для публики, ведля котрого XIII. Лев. с тими словами е предсказанный: „Свѣтлость из неба“, X. Пій: „Огень горячій,“ XV. Венедикт: „Вѣра спустошена,“ XI. Пій: Вѣра непоколебима.“

Но суть пророчества из новѣйших времен: Из 17. столѣтія изясненіе Апокалипсиса от всечестного О. Варѳоломея Голзгаузер, нѣмецкого священника, окрем того пророчество монахинѣ: Марії Латасте (1822—1847), Магдалены Порсат (умерла в. р. 1846.) и Катарины Еммерих (1774—1820.)

Понеже их пророчества относятся головно на теперѣшнѣ часы, зато дуже интересантно с ними заниматися и в тых смутных часах можеме из них много потѣхы и надежды черпати.

Коли раз мнѣшка: Марія А Латасте (то 8-го дек. было) по св. причащенію с найглубшою побожностю молилася, учula

голос своего небесного Жениха, который так до неё говорив: (La vie et les oeuvres de Marie Lalaſte Tome II. livre III. 4.) „Дѣвицо моя! Твоя побожность ми и моей матери дачто... Я выбрав собѣ одного папу..... он буде епископов всей земли собрати, жебы чув, что они говорять о непорочном зачатю Маріи и их слова будуть за словами его согласитися. Его голос буде въру прочих голосов проповѣдати и по цѣлом свѣтѣ издасть отклик (отголосок). Тогда моя матка не буде терпѣти в почитанію недостатки. Пекелнѣ силы будуть против сего почитанія Маріи боротися.....

Моя матка на едной твердой скалѣ появиться пред свѣтом.... На єї челѣ с огненными буквами буде выписано: Я ем град Господень, обидимых заступница, скорбящих радость, щит против „непріятелей“.

Перша часть пророчества Маріи Латасте по єї смерти (она в 1847-ом року умерла) из слова на слова сполнилася, понеже IX. Пій в р. 1854. 8-го дек. (и она свое видѣніе 8-го дек. мала!) Дав созвати всѣх епископов земли и проголосив непорочное зачатіе Пр. Д. Маріи.

Друга часть пророчества єї выполнилася 25-го марта 1858. коли Пр. Д. Марія в Лурдѣ на едной скалѣ появилася с тими словами: „Я ем непорочное зачатіе“.

О правду має Марія Латасте, же на єї челѣ буде выписано, что она е град Господень, обидимых заступница, скорбящих радость и щит против непріятелей! С єї помощю тысяч и тысяч хворых выздравилися, смутнѣ потѣху нашли, мnoзѣ достигли щасливость сеземну и вѣчну. — Выполнiliся и тѣ слова, что Прч. Д. Маріа не буде мати недостатки в почитанію. Ибо в XIX. столѣтію — еще живо памятаeme — значительно розвився живот Маріанских конгрегацій, люде зачали толпами ходити на отпustы, побожность майова, побожность св. Ружанца и Параклиса в доти не познатой мѣрѣ розширилася. Даремно усиловалися сie почитаня Пр. Д. Маріи пекелнѣ силы, т. е. свободи муравы и ишѣ безбожники зливочити.

Смотрѣм але totы слова пророчества Маріи Латасте, котрѣ на теперѣшнѣ часы относяться. Еї небесный Жених еще и то сказав: „Тепер але смуток прїде на землю. Город котрый я люблю..... из кождого боку, як в сѣти заперта птица, от непріятелей буде обнятый. Так видится, як бы сей город за три роки и еще дачто, и упаде.. Но моя матка вселиться донього, единого старика, котрый на тронѣ сидить, поѣмать за руку и так к нему скаже: Час уже пришов! Я даю их за рядом уничтожити.

Навернеся покой по цѣлом свѣтѣ и от рана до полудня, от полночи до вечера всѣ будуть Марію прославляти, Марію непорочно зачату, Марію, царею земли и неба. Аминь“.

В сей части пророчества (город) от непріятелей пренаслѣдований означуе Св. Мати Церков. Воистинну так видѣлося, якбы сія Церков за 3 роки и еще за еден малый час, котрѣ роки по войнѣ стекли, на поедных мѣстах уничтожилася. И в нашей республицѣ уже о том было слово, что всѣ маєтки церковнѣ сконфискують, из храмов Божіих театры и стайнѣ зроблять.

По словам пророчества Св. Мати Церков от всѣх бѣд освободить Пр. Д. Марія, котра на сесю цѣль выбере собѣ одного старенького человѣка на тронѣ сѣдящаго и с ним уничтожить непріятелей Церкви. Кто знає, ци уже не выполнилися и тѣ слова? Кто знає, ци она уже не казала едному старику на престолѣ сѣдящому: Час уже пришов. Встань горѣ против непріятелей Церкви! ? Если попереднѣ пророчества выполнилися, можеме запоруку мати, же выполниться и сіе. — О Господи Боже! Кто буде сей стариц на тронѣ сидячій? Може теперѣшній Римскій Отец, котрый в пророчествѣ Малахійском словами „Вѣра непоколебима“ е описан? Або теперѣшній старенький таліянскій краль, котрый має найрелигіознѣйшого министерпрезидента Муссолинія? Кто бы знато повѣсти? Будущность укаже!

Едно певно, что в сесих смутных обставинах Св. М. Церкви Пр. Д. Марія буде велику ролю грати, чтобы непріятелї Церкви изчезли, „яко изчезает дым, яко тает воск от лица огня“. Пряшевска епархія под новым епископом под охрану Пресв. Д. Маріи поставлена. О милѣ братя! в сих смутных часах поручаймесь под покров Пр. Д. Маріи, выберме собѣ одну красну молитву и молѣмся каждый день к ней, ибо є є помоч не лиш могуча, але всемогуща, по словам св. Козмы Іерусалимского: „Всемогуща е твоя помоч о Marie“. О ей сильной помочи в сих смутных часах е слово. Опрочих еще интересантнѣйших пророчествах XIX. столѣтія, в будущем буде слово.

A. K.

Новости

Батюшко боиться владык. Дня 4-го юнія быв в Бедевіи (ж. Мармороска) „праздник законоломства“. Декретовав го якійсь „учоний“ шизматицкій владыка, котрый пришов сегодня поблагословити „свої благовійнѣ овечки“. Натѣшився, что сесѣ вже не лиш у нашої церкви знают свистати та дрымбати на службѣ Божій, но вже совокупно с своим епископом свищуть на законы державы, высмѣхують рѣшеніе судової столицѣ и на-

смѣшкуються над седмою Божією заповѣдью. Переблагословив церков нашу, пам судом законно передану. Та як бы не быв там при таком законодомствѣ и отец Рацин (родом из Шарду, бѣгом из Америки?) Его вульховска процесія пѣшки ишла, а он во сопровожденіи *своих общезнатых* двох псов приѣхав вже переже. Почему и псы? Тому — толкуютъ нѣкоторѣ — бо Рацин боиться от владык. Наш владыка Преосвящ. еп. Антоній править вульховску церков и фару. Оден шизматицкій владыка казав что „атьоц Андрей большевик“. И Рацин на только боиться и от слова сего „владыка“, что вже в вульховской церкви под его службою и не спѣваютъ: „*На многая лѣта Владыко!*“ (т. е. Господи, Боже), в молитвѣ „Пресвятая Тройце помилуй нас...! не говорять: „*Владыко прости беззаконія наша!*“, чтобы о владыцѣ“ и слова не было.

Атьоц Рацин! Пред сеземими владыками обронять еще Вас псы, по пред „небесным“ „*Владыком*“ надѣемся, что будуть вам зубы цоркати, коли запросить от вас рахунок о „вѣрломствѣ“, о „уніятских (?) та православных (?) парастасах“, о „всѣх нас православных“ и о ироичих „апостольских (?) дѣйствовашіях. Вѣроятно, там не поможет нич анѣ „вѣрность“ двох псов ваших, анѣ печать вульховского Божого старосты! О, Gott hilf!

Епархіальное правительство с повним довѣріем смотрить на душеспасительну дѣятельность нашої газеты и еѣ як пайщикѣйше вручає священникам и вѣрникам нашої епархіи. И се есть оден доказ против порожних накидов наших домашних непріятелей и отповѣдный отвѣт на напады одиноких газет руських и мадярских. В послѣдном циркуляре сякими теплыми словами вручає Преосвященный Епископ нашу газету и нашу брошурку: „Где глядати правду?“ :

„В изданіи нашей милой духовной газеты „*Благовѣстник*“ от Михаила Гелебана селянина и ревного гр. кафт. вѣрника из Копашньова на долях появилася одна иллюстрованна и богатого содержанія книжочка под заглавием: „Где глядати правду?“ Писатель книжки, як человѣк простого рода есть щирым сыном своего руського народа, но разом и наймилѣйшим борцем своей православно кафт. церкви и епархіи.

В своих молодых лѣтах и он заблудив в Фотіянской схизматицкой темнотѣ, но всемилостивый Бог подав ему свою ласку, с острым умом спознав изась залишенну истинну, за которую теперь уже и живот свой готовый положити. Гелебан простыми но ясными словами познакомить в своей книжцѣ всѣ тѣ волны своей душевной борьбы, котрѣ его от Фотія изась к Хрту Гду привели и так книжка его достойно называется источником, из которого в днешной религійной борьбѣ упадшъ воскресеніе, крѣпкѣ утѣшеніе и сомнѣваючѣ подкрѣщеніе могут черпати.

В своем интересѣ робить каждый о. духовный и свѣдомый гр. кафтолик, если ширить сю книжочку меже народом. Цѣна книжочки 1 Кч. и заказати можно ю в редакціи Благовѣстника, Ужгород, Капитульска ул. 3. Интересанту и благополезну книжочку, як таожде единствену нашу духовну газету „Благовѣстник“, которую еще и из стороны непріятелей наших прилѣжно читають, повторительно вручаю в внимание и подпираніе всеч. духовенства нашего.“

— **Нещастя, ци Божа рука?** Из Лозы (Угоча) Иван Студник селянин и его жона також подумали чтось мудрого и рѣшили залишити свою отцевску гр. каѳ. вѣру и переступити на суботницку. Як 2-го юнія (в суботу) пошли до Ильини записатися, вертаючи дому так муж, як и жона удурѣли. Иван Студник почав в селѣ страшио гойкати: Братья, сестры туй е страшный суд, пропадеме. Нещастного чоловѣка занесли у Ужгородску больницу.

Короткѣ вѣсти. — Епископ сукмарскій др. Тибор Боромисса прибыв до Ужгорода, чтобы выдѣлiti римо-кат. вѣрникам Тайну Миропомазанія. — 28 кардиналов подписало просьбу, чтобы ся зачав дослѣд в дѣлѣ оголошення за святого усопшого папы римского Пія Х-го. — Американскѣ суботники собрали 10 миллионов долларов на розширенія вѣры адвентійской в Африцѣ. — Англицкій архієпископ перед одним собраніем заявил, что на будучом вселенском соборѣ шертрактовано буде и соединеніе англиканской церкви с кафтолическою. — Из даров посланых папою для голодуючої Россіи утримують 700 кухонь, покормлюють 124.000 особ и кромѣ того многим удѣлюють одежду и лѣки.

ПЕРЕПІСКИ РЕДАКЦІИ.

К. Л. Муничево. И мы с удивленіем читали в „Р. З.“, что Мукачевска гармонія, котра як знаеме и в церкви гр.-ой спѣває на службѣ Божій и котрою управляє один клерик нашъ єпархіи п. Ставровскій пошла до Лучок и там перед пізматицкою публикою отспѣвала церковнѣ пѣснѣ. Кажеть лиш п. Ставровскій, як вы себе чувствовали, коли вас „уніятскаго клерика“ привѣтсовав батюшко Иличко?

Н. Просиме по руськи писати. Не маєме часу перекладати!

Священники не забудьте засылати предплаты и розширяти меже вѣрниками „Благовѣстник“!

РЕДАКТОР-ИЗДАТЕЛЬ:
АВГУСТИН ВОЛОШИН.

ОТВѢЧАТЕЛЬНЫЙ РЕДАКТОР:
ЕМИЛІЯН БОЖШАЙ.